



## ԲԱՐՁՐԱԳՈՒՅՆ ԴԱՏԱԿԱՆ ԽՈՐՀՈՒՐԴ

ԲԴԽ-58-Ո-127  
2019թ.

### Ո Ր Ո Շ ՈՒ Մ

#### ԱՌԱՋԻՆ ԱՏՅԱՆԻ ԴԱՏԱՐԱՆՆԵՐՈՒՄ ԴԱՏԱՎՈՐՆԵՐԻ ԹԵԿՆԱԾՈՒՆԵՐԻ ՑՈՒՑԱԿԻ ՀԱՄԱՊԱՏԱՍԽԱՆ ՄԱՍՆԱԳԻՏԱՑՄԱՆ ԲԱԺԻՆՆԵՐԻ ՀԱՄԱԼՐՄԱՆ ՄԱՍԻՆ

«Հայաստանի Հանրապետության դատական օրենսգիրք» սահմանադրական օրենքի (այսուհետ՝ Օրենք) 95-րդ հոդվածի 2-րդ մասի համաձայն՝ «Բարձրագույն դատական խորհուրդը մինչև յուրաքանչյուր տարվա սեպտեմբերի 1-ը հաշվարկում է հաջորդ երկու տարվա ընթացքում առաջին ատյանի դատարանում դատավորների թափուր պաշտոնների համալրման համար անհրաժեշտ դատավորների քանակը և դրա հիման վրա որոշում է կայացնում դատավորների թեկնածուների ցուցակի համապատասխան մասնագիտացման բաժնի համալրման անհրաժեշտության մասին, եթե դատավորների թեկնածուների ցուցակում առկա թեկնածուների քանակը համապատասխանաբար քրեական և քաղաքացիական մասնագիտացման բաժնում չի գերազանցում հաջորդ երկու տարում թափուր պաշտոնների կանխատեսվող քանակը չորսով, իսկ վարչական մասնագիտացման բաժնում՝ երկուսով»:

Օրենքի 110-րդ հոդվածի 1-ին մասի համաձայն՝ «Բարձրագույն դատական խորհուրդն Արդարադատության ակադեմիայում ուսուցումն ավարտած դատավորների թեկնածուների հավակնորդներին ներառում է դատավորների թեկնածուների ցուցակներում՝ ըստ համապատասխան մասնագիտացումների»:

Ելնելով վերոգրյալից և հաշվի առնելով այն հանգամանքը, որ Բարձրագույն դատական խորհրդի 2018 թվականի դեկտեմբերի 20-ի թիվ ԲԴԽ-59-Ո-165 որոշմամբ դատավորների թեկնածուների հավակնորդների ցուցակում ընդգրկված քաղաքացիական մասնագիտացման թեկնածուներից 12-ը, քրեական մասնագիտացման թեկնածուներից 5-ը, վարչական մասնագիտացման թեկնածուներից 2-ն Արդարադատության ակադեմիայում ուսուցումն ավարտելու են սույն թվականի հոկտեմբեր ամսին, իսկ Բարձրագույն դատական խորհրդի 2019 թվականի մայիսի 24-ի թիվ ԲԴԽ-36-Ո-83 որոշմամբ դատավորների թեկնածուների հավակնորդների ցուցակում ընդգրկված քաղաքացիական մասնագիտացման թեկնածուներից 10-ը, քրեական մասնագիտացման թեկնածուներից 4-ը և վարչական մասնագիտացման թեկնածուներից 2-ը դեռևս չեն սկսել ուսուցումն Արդարադատության ակադեմիայում՝ ուստի նրանք, որպես դատավորի թեկնածուներ, չեն կարող ընդգրկվել մինչև սույն

թվականի սեպտեմբերի 1-ը Օրենքի 95-րդ հոդվածի 2-րդ մասով կատարվելիք հաշվարկում:

Նման պայմաններում ներկայումս գործող դատավորների թեկնածուների ցուցակում, ըստ համապատասխան մասնագիտացման բաժինների, առկա են՝ քաղաքացիական մասնագիտացման բաժնում՝ 0 թեկնածու, քրեական մասնագիտացման բաժնում՝ 0 թեկնածու, վարչական մասնագիտացման բաժնում՝ 1 թեկնածու:

Հարկ է նշել, որ առաջին ատյանի դատարաններում առաջիկա երկու տարում թոշակի է անցնելու քաղաքացիական գործեր քննող 5, քրեական գործեր քննող 6 և վարչական գործեր քննող 1 դատավոր: Բացի այդ, ներկա պահին առաջին ատյանի դատարաններում առկա է դատավորի 13 թափուր հաստիք, որից 7-ը՝ քաղաքացիական մասնագիտացման, 6-ը՝ քրեական մասնագիտացման:

Ամփոփելով վերոգրյալը՝ կարելի է արձանագրել, որ 01.01.2020-31.12.2021թթ. առաջին ատյանի դատարաններում կանխատեսվում է դատավորի 12 թափուր հաստիքի առաջացում:

Այսպիսով, հաշվի առնելով այն հանգամանքը, որ դատավորների թեկնածուների ցուցակի քաղաքացիական և քրեական մասնագիտացման բաժիններում թեկնածուներ առկա չեն, իսկ վարչական մասնագիտացման բաժնում առկա թեկնածուների քանակը չի գերազանցում հաջորդ երկու տարում կանխատեսվող թափուր հաստիքների քանակը երկուսով, ուստի անհրաժեշտ է համալրել դատավորների թեկնածուների ցուցակի քաղաքացիական, քրեական և վարչական մասնագիտացման բաժինները:

Օրենքի 95-րդ հոդվածի 3-րդ մասի համաձայն՝ «Դատավորների թեկնածուների ցուցակի համալրման համար անհրաժեշտ թեկնածուների քանակի հաշվարկը կատարվում է հաջորդ երկու տարվա ընթացքում քրեական և քաղաքացիական մասնագիտացման բաժիններում համալրման համար անհրաժեշտ քանակը յոթական թեկնածուով, իսկ վարչական մասնագիտացման բաժնում՝ երկու թեկնածուով գերազանցող քանակի հաշվարկով»:

Վերոգրյալի արդյունքում անհրաժեշտ է դատավորների թեկնածուների ցուցակի քաղաքացիական մասնագիտացման բաժինը համալրել 12 թեկնածուով, քրեական մասնագիտացման բաժինը՝ 13 թեկնածուով, իսկ վարչական մասնագիտացման բաժինը՝ 2 թեկնածուով՝ հիմքում դնելով հետևյալ հաշվարկը.

- քաղաքացիական մասնագիտացում - (3 /2020թ. կանխատեսվող թափուր պաշտոնների քանակ/ + 2 /2021թ. կանխատեսվող թափուր պաշտոնների քանակ/ + 7 Օրենքի 95-րդ հոդվածի 3-րդ մասի պահանջ/) – 0 /ներկա պահին դատավորների թեկնածուների ցուցակում առկա թեկնածուների քանակ/).

- քրեական մասնագիտացում - (4 /2020թ. կանխատեսվող թափուր պաշտոնների քանակ/ + 2 /2021թ. կանխատեսվող թափուր պաշտոնների քանակ/ + 7 /Օրենքի 95-րդ հոդվածի 3-րդ մասի պահանջ/) – 0 /ներկա պահին դատավորների թեկնածուների ցուցակում առկա թեկնածուների քանակ/).

- վարչական մասնագիտացում - (1 /2020թ. կանխատեսվող թափուր պաշտոնների քանակ/ + 0 /2021թ. կանխատեսվող թափուր պաշտոնների քանակ/ +

**2 /Օրենքի 95-րդ հոդվածի 3-րդ մասի պահանջ/) – 1 /ներկա պահին դատավորների թեկնածուների ցուցակում առկա թեկնածուների քանակ/).**

Ելնելով վերոգրյալից և հիմք ընդունելով Օրենքի 94-րդ հոդվածի 1-ին մասը և 95-րդ հոդվածի 2-րդ մասը՝ Բարձրագույն դատական խորհուրդը

## **Ո Ր Ո Շ ՈՒ Մ Է**

1. Հաստատել դատավորների թեկնածուների ցուցակի համալրման անհրաժեշտ թվաքանակը, համապատասխանաբար՝

- քաղաքացիական մասնագիտացման բաժին՝ **12 (տասներկու)** թեկնածու.
- քրեական մասնագիտացման բաժին՝ **13 (տասներեք)** թեկնածու.
- վարչական մասնագիտացման բաժին՝ **2 (երկու)** թեկնածու:

2. Սույն որոշումն ուժի մեջ է մտնում հրապարակմանը հաջորդող օրվանից:

**ԲԱՐՁՐԱԳՈՒՅՆ ԴԱՏԱԿԱՆ  
ԽՈՐՀՐԴԻ ՆԱԽԱԳԱՀ**

**Ռ. ՎԱՐԴԱԶԱՐՅԱՆ**

2019թ. օգոստոսի 21  
ք. Երևան